

C'era na vota nu re c'aviva nu figghi chi non si vuliva maritari picchè non trovava nudda fimmina chi faciva pi iddu. Stu principi era nu tipu particolari, aviva nu modu soi di parrari. Nu iornu u re u chiamau e ci dissi : “ O ti trovi tu na mughieri o ti la trovu ieu picchi non vogghiu muriri prima mi ti viu maritatu” U principi allura ci rispundiu. “ Patri, dassati mi vaiu in giru pu regno mi trovu na fimmina chi mi capisci” e cussì partiu cu so cavaddu.

Camina, camina, passavuni i iorna e i misi, giravai pa muntagna e pa marina, ma non rinisciva a truvari chidda chi cercava. Nu iornu arrivau nda nu paisi e mentri passava pi na strata vidi na bedda figghiola nfacciata a na finesra chi filava. Era propriu bedda e o principi ci piaciu assai, allura a salutau: “ Bonasira cu stu filu a stendi”.(Bonasira a vui chi filati). Meravigghia da meravigghia, idda ci rispundiu: “ Bonasira a vui cu chissu ca vi pendi” (bonasira a vui c'avita a spada chi vi pende).

Varda dda, pinsau u principi, chista mi capisci e continuau : Picchè o scuro stati?” (picchè siti vistuta i niru?) Idda ci rispundiu: “Mi muriu u frati” A stu puntu u principi si convinciu cu capisciva e allura ci chiesi ospitalità: “.....” Idda ci dissi:”..... C'è nu pocu i raschiusu pu vosru pilusu” (.....C'è nu pocu i frenu pu vosru cavaddu) E cussì u principi si firmau a durmiri nda stadda, ma prima mi si curca a mamma e u patri u nvitarunu a cena.

A mamma aviva preparatu nu pollu rustutu e u patri pinsau mi nci faci fari i parti all'ospiti. U principi allura tagghiau a testa e ci adessi o patri, l'ali ci dessi a mamma, u pettu a figghia e iddu si mangiau u restu. Poi iu mi si curca nda stadda, ma sintiva a mamma e u patri chi burbuliavunu cuntru a iddu. “ Bedda cosa chi fici! A nui ndi dessi i parti chiu scarsi e iddu si mangiau u restu”

Sintiu però ca figghia u difindiva: “Patri, a vui vi dessi a testa picchè situ u capu da casa, a vui, mamma, vi dessi l'ali picchè siti comu a sciocca pi nuatri figghi, a mia mi dessi u pettu picchè sugnu signurina e iddu si mangiau u restu” A stu puntu u princi si fici cunvintu c'aviva truvatu a fimmina chi faciva pi iddu. U iornu dopo, prima mi parti, a figghia ci offriu u caffè. U principi pigghiau a tazzina e ci dissi: “Beddha sta tazza si non è sciaccata” iddha ci rispundiu :”Nossignori non sugnu zita”. Allura u principi si palesau e dissi c'a vuliva pi mughieri. Turnau a palazzu pi preparari u matrimoniu, ma pinsau mi ci manda nu pinseru pi ricambiare l'ospitalità: na spasa cu 30 ova, 7 iaddhini e na damigiana i vinu. Chiamu nu serbu e ci dessi u paccu dicendu: “Portancillu a me zita e dicci cusì: ”U misi è i 30 iorna, setti iorna 'ndavi a simana e a luna è china”.

U serbu partiu, ma strata facendu ci vinni fami e, apriu u paccu , si mangiau du ova, nu pollu e si nbiviu nu pocu i vinu. Quandu ruvau nta zita ci cunsignau u paccu e ci dissi: U principi vi manda stu presenti e mi dissi mi vi dicu cu misi è i 30 iorni, setti ndavi a simana e a luna è china”. A zita apriu u paccu e si ndaccurgiu chi mancava caccosa.

Allura ci dissi o serbu: “ Ringrazia u principi e dicci cu misi è i vintotto iorni, a simana i sei e a luna non è china, ma ricorditi mi ci dici puru chi si voli beni a palumba non c'avi a minari o sceccu.” U serbu turnau davanti o principi e ci dissi:” A vosra zita vi saluta e mi dissi mi vi dicu cu misi è i vintotto iorni, a simana i sei e a luna non è china.

Ah disgrazziatu, cominciau a gridari u principi, cuminciandu a pigghiarlu a timpuliatu. A stu puntu però u serbu si ricurdau da raccomandazioni da zita e ci dissi: “ Aspittati, mi dissi mi vi dicu puru

chi si voliti beni a palumba, non c'aviti a minari o sceccu" Allora u principi ci dissi: "Pi stavota ti sarbasti" e non ci minau. Nu misi dopo si maritaru e vissiru felici e cuntenti e nui senza nenti.

Angela e Oriella Diano (by mamma Saverina)